

ajunginek pivlugo. Ânanamik kâfeliorsôngovok, polisillo pagvisarlungilât. "Miksekârtôvok," okarpok ingminut; annersaumilerivorlo. Kênaujat kattertortane ikpiarsuminut kittinamigit, pijarellune kattaivok attautsemik nunamut, kittitsigannerporlo attaruililune kammangitsertorlune. Niviarsiarle kannitamine iksivajok kammagitsiarkassiutivâ kanok piniarniarmangât. Kênangata tautua sokkoserlugane, sorrutsib kênaujak mattuvâ ittikaminut, pilloriksârlunelo nussugiarpâ. Annikitomik Danielib omatinga âniarpok, tagvainarle kувiasutuinarpok, tigliktokulluk nellunginamiuk. Mâna angerarniarpok, aularkâranele sennibvartiniarpait ittigangit, kênaujakulluk ijertaumajok sagvartaurkovlugo, taimailikârdlunelo innerterniarpâ tagvane sakkerungnairkovlugo. Issumavok, 'Tagga, tamadja opigosungninga. Magguertorlunga uvlârsiutiksanganik tunitjivigisimavara, piviksakatuallermallo tiglikomervigigasuarpânga.' Taimak issumajârutekartilugo, nutte Jessikab tautua sokkosersaraipok. Ulluâk kattaktitûk aupalerpuk kugvillo allakkarput ijigingne. Okkolune kênaujak ittikame attânit tiguâ, allarterlugolo annorâmine, illilâllo sâb kânganut Danielib aggangita sennianut, okausekaranele attautsemiglônêt. Danielib takkonârpâ katsungaidlune.

"Sunaunâ?" aperivok.

"Tagga, Mista Daniel," Jessika kiovok, "kattakpok tussarlungilallo."

"Jess," Daniel okarpok illungertorlune, "tamainik kigligiutilaunga."

"Illa, Mista Daniel," mannitjorlune okarpok, "kattakpok nunamut aksakârlunelo ittikama attânut, ijerparalo. Pitsiarnit, niakôjarulaillo kâfiblo mamadlarninga issumagivakka, aukanersatigamgalo kiaksauteârule, ijerungnairpara tagva. Maungarungnairkoniarparma imakka."